

ԿՈՍՏԻԿՅԱՆ ՔՐԻՍՏԻՆԵ

ՍԵՖՅԱՆ ՇԱՀԵՐ ՍՈՒԼԵՅՍԱՆԻ, ՍՈՒԼԹԱՆ ՀՈՒՍԵՅՆԻ ԵՎ ԹԱՀՍԱՍՊ II-Ի՝ ԵՐԵՎԱՆԻ ՄԱՏԵՆԱԴԱՐԱՆՈՒՄ ՊԱՀՎՈՂ ՀՐՈՎԱՐՏԱԿՆԵՐԸ

Հայ ժողովրդի ու Իրանի պատմության կարևորագույն սկզբնաղբյուրների թվին են պատկանում պարսից շահերի հրովարտականներն ու հրամանագրերը (ֆերմաններն ու հոքմերը)՝ տրված հայոց վանքերին, ազնվականներին ու համայնքներին զանազան առիթներով:

Երևանի Մ. Մաշտոցի անվան Մատենադարանում պահվում է շահական հրովարտականների ու այլ պարսկական պատմական վավերագրերի մի խոշոր հավաքածու (մոտ 1500): Ամենայն հայոց կաթողիկոսների կողմից ձեռք բերված Էջմիածնի ու ընդհանրապես հայ ժողովրդի զանազան խնդիրներին վերաբերող պարսից շահերի հրովարտականների հակիրճ նկարագրությունները կարելի է գտնել Ս. Երևանցու «Ջամբուտ»¹: Այդ փաստաթղթերի ուսումնասիրման հարցում իր նշանակալի ներդրումն է կատարել հայ ճանաչված արևելագետ Հ. Դ. Փափազյանը, որը բացի արաբատառ մի շարք փաստաթղթերի քննությանը նվիրված իր մի քանի հոդվածներից, ժամանակին ուսումնասիրել ու հրատարակել է շուրջ 66 հրովարտակ և 27 կալվածագիր, որոնցից հնագույնը Սուլթան Ջեհանշահի 1449թ. հրովարտակն է, իսկ վերջինը՝ Շահ Աբաս II-ի 1650թ. հրովարտակը²:

Չնայած բազմալատակ գիտնականի կատարած մեծ աշխատանքին, Մատենադարանի արաբատառ վավերագրերի (հատկապես 1650թ. հետո ընկած ժամանակաշրջանի) մեծ մասը մնում է չուսումնասիրված և գիտական լայն շրջանառությունից դուրս: Նշենք նաև, որ նրանց վերաբերող Մատենադարանի ցուցակները (Կաթողիկոսական դիվան, Մելիք-Շահնազարյանների ֆոնդը) ճշգրիտ չեն և թույլ չեն տալիս վստահաբար հենվել նրանց հակիրճ բնութագրումների վրա: Այս պատճառով կարծում ենք, որ Մատենադարանի արաբատառ ֆոնդերի այս արժեքավոր հավաքածուի ուսումնասիրությունը ու նախ և առաջ նրանց ցուցակների կազմումը հայ արևելագիտության առաջնահերթ խնդիրներից է: Սույն հոդվածի շրջանակներում կներկայացնենք Իրանի Սեֆյան պետության թուլացման ու անկման շրջանի շահեր՝ Սուլեյմանի (Սեֆի II- 1666-

1694թթ.), Մուլթան Հուսեյնի (1694-1722թթ.) և Թահմասա II-ի (1722-1732թթ.) Մատենադարանում պահվող հրամանագրերի ու հրովարտականների բնագրերի ու պատճենների համառոտ ընդհանրական բնութագրությունը:

Նախ նշենք, որ հրովարտականներից շատերի բնօրինակները չեն պահպանվել, սակայն պահպանվել են նրանց պատճենները (սավաղները), որոնք ընդհանուր առմամբ կարելի է բաժանել երկու խմբի: Առաջին խմբի մեջ մտնում են բնօրինակի պատճենները տրված դիվան-ալ-սադարաթի կամ շաքիաթական-նոտարական հաստատությունների կողմից՝ կնքված մահմեդական հոգևորականության այդ բարձրագույն ատյանի և սադրի, շեյխ-ուլ-իսլամի կամ մուֆթիի կնիքներով⁵: Այս սավաղները վերցվում էին սովորաբար հրամանների բնօրինակների հետ միաժամանակ կամ ավելի ուշ⁶: Երկրորդ խմբում կարելի է առանձնացնել որևէ կնիքով չկնքված սավաղները: Նման փաստաթղթերից օգտվելուց առաջ անհրաժեշտ է ստուգել դրանց հավաստիությունը: Դրանցից շատերի⁷, մասնավորապես նաև Կաթողիկոսական դիվանի առածին 1գ թղթապանակի մի գրքով ներկայացված այդպիսի սավաղներից մի քանիսի բնօրինակները ևս կան Մատենադարանում⁸, որը թույլ է տալիս հավատալ այդ գրքի նաև մյուս պատճենների իսկությանը: Այս խմբի մյուս սավաղների հավաստիության մեջ համոզվելու հարցում օգնում են դրանց շարադրանքի ձևերի քննությունը, դրանց՝ բովանդակության ու պատմական իրականության համեմատությունը, ինչպես նաև որոշ սխալների առկայությունը. երբ տվյալ ռժին բնորոշ բառի փոխարեն գտնում ենք ուրիշը, որը վկայում է սոսկ արտագրողի վերծանության անճշտության մասին:

Սավաղների հետ չպետք է խառնել այն հրովարտականները, որոնք վերահաստատում են նախորդ շահերի հրամանագրերը: Իսկ նման հրովարտականները Երևանի Մատենադարանում մեծ թիվ են կազմում:

Նշված շահերի իշխանության տարիներին Սեֆյան պետության քաղաքական թուլացմանը զուգընթաց ուժեղանում էր մահմեդական հոգևորականության դերն ու ազդեցությունը երկրի կյանքում: Այս ժամանակաշրջանում Իրանի հոգևորականության առաջնորդը և նրա կարկառուն դեմքերից մեկը Մուհամմադ Բադեր Մաջլիսին էր (1627-1699թթ.), որը շահ Մուլեյմանի օրոք շեյխ-ուլ-իսլամն էր, իսկ շահ Մուլթան Հուսեյնի իշխանության տարիներին հասնելով իր փառքի գագաթնակետին՝ ստանում է նոր ու ամենաբարձր հոգևորականի՝ մուլաբաշիի պաշտոնը⁹: Մատենադարանի մի շարք վավերագրերի վրա գտնում ենք այս հոգևորականի կնիքի դրոշմը և անգամ ստորագրությունը¹⁰:

Չմայած այն բանին, որ վերոհիշյալ շահերը աչքի չէին ընկնում իրենց կրոնական մոլեռանդությամբ՝ ու անհանդուրժողականությամբ, նրանց իշխանության տարիներին ուժեղանում են հալածանքները այլա-

դավան փոքրամասնությունների, այդ թվում նաև քրիստոնյա հայերի նկատմամբ: Այն աստիճան, որ հայության մի շարք հոգևոր առաջնորդներ ձեռքբերակալվում են, իսկ Նոր Զուղայի հայ եկեղեցին սկսում է տարեկան որոշ գումար վճարել պետությանը⁹:

Կենտրոնացված պետության անկման հետևանքով նկատվում է նաև տեղական կառավարիչների, պաշտոնյաների կամայականությունների ու չարաշահումների ուժեղացում, ինչպես նաև զանազան օրինախախտ տարրերի ակտիվացում: Կաթողիկոս Հակոբ Զուղայեցու ջանքերով Իրանի մահմեդական հոգևորականության քարձրագույն ատյանից ձեռք են բերվում հայ ժողովրդի համար կենսական նշանակություն ունեցող կրոնական իրավունքներն ու սովորույթները պաշտպանող հաստատուն ֆեթվաներ և դրանք վավերացվում շահական հրովարտականերով: Այս փաստաթղթերը կոչված էին ապահովելու «ձնազանդ զինմի հպատակներ հանդիսացող» հայ բնակիչների, օրինակ, հայկական օրենքներով ամուսնանալը, հանգուցյալներին թաղելը, եկեղեցու զանգեր խփելը, ժամերգություն կատարելը¹⁰, ինչպես նաև եկեղեցիներ վերանորոգելն ու նորերը կստուցելը¹¹: Այդ ֆեթվաները շարիաթական-նոտարական պատճեններով (սավադներ) բազմացվում և ուղարկվում էին բոլոր թեմերին¹²:

Շահ Սուլեյմանի կողմից զանազան եկեղեցիների վերանորոգման առթիվ տրված մի շարք հրովարտակաները, որ կարգադրում են տեղական կառավարիչներին թույլատրել ու օժանդակել հայերին, արտացոլում են այն իրողությունը, որ XVII դարի երկրորդ կեսում շարունակվում է նույն դարի առաջին կեսում սկսված լայնածավալ եկեղեցական շինարարությունը: Այսպես, 1664-1665թթ. շահի հրամանով¹³ ու տեղի կառավարիչ Միքդա Իբրահիմի համձնարարությամբ վերանորոգվում է Ս. Հովհաննես եկեղեցին¹⁴, 1669թ. սկսում են շինել Խորվիրապի եկեղեցին, Մուղնու Ս. Գևորգի եկեղեցին¹⁵: 1679-1685թթ. վերանորոգվում է Ս. Թադեոս Առաքյալի եկեղեցին¹⁶, 1698թ. Ս. Գեղարդի վանքը¹⁷ և այլն:

Մեֆյան Իրանին հպատակ հայության սոցիալ-իրավական վիճակի ու հայոց վանքերին վերաբերող հարցերի շուրջ հրապարակված ֆեթվաներն ու հրովարտակաները հրապարակվել են հիմնականում XVII դարի 60-ական թվականներին:

Հակոբ Զուղայեցի կաթողիկոսը այդ ժամանակաշրջանում վճռական պայքար է մղում հատկապես Երևանի բեկլաքբեկ Մեֆի Դուլի խանի ասիմիլյացիոն քաղաքականության, Էջմիածնի հարստահարման և նրա իրավունքների սահմանափակման քաղաքականության դեմ¹⁸: Մատենադարանի ինչպես այս, այնպես էլ ավելի վաղ ժամանակաշրջանի շահական հրովարտակաների մեջ զգալի տեղ են զբաղեցնում Էջմիածնի, Տաթևի և այլ վանքերի վակֆային կալվածքների անձեռնմխելիությունը և նրանց մուաֆությունը (պետական հարկերից ազատված լինելը) պաշտ-

պանող փաստաթղթերը¹⁹: Այս կարգի փաստաթղթեր ձեռք են բերվում մասն. Հակոբ Ջուղայեցուն հաջորդած կաթողիկոսների օրոք²⁰: Այսպես, 1684թ. Եղիազար կաթողիկոսի խնդրագրի հիման վրա շահ Սուլիյմանի կողմից տրված հրովարտակը կոչված էր պաշտպանելու Էջմիածնի կալվածքների անձեռնմխելիությունը Հակոբ Ջուղայեցի կաթողիկոսի օրոք արված պարտքերի դիմաց պարտատերերի ունեցածություններին²¹:

Ըստ հաստատված կարգի հայ կաթողիկոսների ընտրությունը հաստատվում էր շահական հրամանագրով: Մատենադարանի Կաթողիկոսական դիվանում կարելի է գտնել այս ժամանակաշրջանի Էջմիածնի ու Գանձասարի գրեթե բոլոր կաթողիկոսների իրավունքները հաստատող հրամանագրերը կամ նրանց պատճենները:

Շահ Սուլթան Հուսեյնի իշխանության տարիներին (1694-1722թթ.) Իրանի պետության հետագա անկման հետևանքով կրկնակի, եռակի չափով ծանրանում են հարկերը: Բացի այդ պետական վերահսկողության քացակալության պայմաններում հաճախանում են տեղական կառավարիչների ու մյուս պաշտոնյաների անօրինականություններն ու չարաշահումները: Այս պատճառով նրա օրոք հայ եկեղեցու կողմից ձեռք բերված հրամանագրերի մեջ հատուկ տեղ են գրավում իշխանության տեղական ներկայացուցիչների ապօրինի արարքների դեմ ուղղված հրովարտակները²²:

Երևանի Մատենադարանի Մելիք-Շահնազարյանների ֆոնդում պահվում են վերոհիշյալ շահերի իշխանության ժամանակաշրջանի որոշ փաստաթղթեր, այդ թվում մասն. Գեղարքունիքի Մելիք-Շահնազարյանների տոհմի ներկայացուցիչների մելիքական ու կալվածատիրական իրավունքները հաստատող հրամանագրեր²³:

XVIII դարի սկզբի հրովարտակների մեջ առանձին հետաքրքրություն են ներկայացնում Եվրոպացի կաթոլիկ միսիոներների՝ «ֆրանկների ու պատրիկների», հայության շրջանում ակտիվ գործունեության դեմ ուղղված հրամանագրերը: Կաթոլիկական քարոզչությունը Արևելքում և մասնավորապես Իրանում ու Անդրկովկասում հին պատմություն ունի: Այն սկսվել էր դեռևս մոնղոլական Հուլավայան պետության ժամանակաշրջանից՝ XIII դարի երկրորդ կեսից: XVII դարի երկրորդ կեսից կաթոլիկական քարոզչությունը Իրանում և նրան հպատակ հայկական տարածքներում ակտիվացել էր կապված Արևմտյան Եվրոպայի երկրների հետ առևտրա-տնտեսական ու քաղաքական կապերի սերտացման հետ և մեծ վտանգ էր ներկայացնում պետականությունից զուրկ հայությանը՝ պառակտելով ազգը և ստեղծելով միմյանց դեմ թշնամաբար տրամադրված խմբավորումներ: Հանդիպելով մահմեդականների շրջանում իրենց քարոզչության նկատմամբ շահական կառավարության ու հոգևորականության անհանդուրժողականությանը՝ կաթոլիկ միսիոներները մեծ նշանակություն էին տալիս

հայության շրջանում տարվող իրենց աշխատանքին: Նրանք շահական արքունիքից ստանալով արտոնություններ, ինչպես նաև կաշառելով տեղի կառավարիչներին կարողանում էին ազատ քարոզչություն ծավալել, որի հետևանքով հետևորդների խմբեր ունեին Անդրկովկասի գրեթե բոլոր քաղաքներում ու Իրանի հայության շրջանում:

Կային մի շարք հանգամանքներ, որոնք հայերին խոցելի էին դարձնում կաթոլիկական քարոզչության առաջ: Նախ այն, որ հայ ժողովուրդը գուրկ էր պետականությունից, հետևաբար նաև պետության կողմից կրոնի հովանավորությունից: Հայ բնակչության համակրանքը շահելու համար միսիոներները բարեգործությամբ էին զբաղվում. անվճար բուժօգնություն ցուցաբերում, երեխաներին կրթում և այլն²⁴: Եվրոպացի միսիոներները հայ ժողովրդի ու հոգևորականության առաջ այն պատրանքն էին ստեղծում, թե Հռոմի եկեղեցու դավանանքն ընդունելու դեպքում հայ ժողովրդի ազատագրումը եվրոպական երկրների օգնությամբ հնարավոր կլինի²⁵: XVII դարի երկրորդ կեսում, երբ հայ եկեղեցու ղեկավարները Արևմտյան Եվրոպայի երկրներից օգնություն էին ակնկալում հայ ժողովրդին պարսկա-թուրքական տիրապետությունից ազատագրելու համար, կաթոլիկական քարոզչությունը թափանցել էր անգամ հայոց հոգևոր կենտրոն Եջմիածնի կաթողիկոսարան²⁶: Միաժամանակ կաթոլիկական դավանանքն ընդունած հայկական համայնքները եվրոպական իշխանավորների միջնորդագրերի շնորհիվ որոշ արտոնություններ ունեին Իրանի տիրապետության տակ գտնվող տարածքներում²⁷: Պետք է նշել, որ Իրանի շահական իշխանությունները հակասական քաղաքականություն էին վարում կաթոլիկ միսիոներների նկատմամբ: Չցանկանալով նրանց պատճառով վատթարացնել իրենց հարաբերությունները եվրոպական պետությունների հետ՝ նրանք մի կողմից պաշտպանում էին կաթոլիկ միսիոներների ազատ գործունեության իրավունքները, շնորհով արտոնություններ, մյուս կողմից սահմանափակում դրանք՝ հոգուտ Իրանին հպատակ հայության: Եվ այդ քաղաքականությունն իր դրսևորումն է գտել շահական հրովարտակներում: 1708թ. Ֆրանսիայի և Իրանի միջև կնքված պայմանագրի 27-րդ կետով Ֆրանսիացի հոգևորականներին ու մյուս միսիոներներին իրավունք էր տրվում ազատ կերպով իրենց հավատի արարողություններն ու ծեսերը կատարել: Ոչ ոք չպետք է նրանց նեղեր, այն պայմանով, որ քրիստոնյաները իրենց տներից ու եկեղեցիներից դուրս չհա հավատին հակառակ արարքներ չգործեն: Պայմանագրի նույն կետով Կովկասի քաղաքներում, Սպահանում, Թավրիզում ու Իրանի մյուս վայրերում բնակվող կարմելիտ, եզուիտ, դոմինիկյան ու օգոստինյան քահանաներին միանշանակ կերպով տրվում էր գործունեության ազատություն²⁸: Ֆրանսիայի դեսպան Միշելը միջամտում է միսիոներների և իրանահայ եկեղեցականների բախումներին:

1708թ. նա ձեռք է բերում շահական հրամանագրեր «միսիոներներին նեղացնողներին պատժելու համար» հասցեագրված մեկը Վրաստանի Վախթանգ թագավորին, մյուսը՝ Թավրիզի բեկլարբեկին: Այդ հրամանագրով հրահանգվում էր միսիոներներին չնեղել ու չարգելել հայերին կաթոլիկական եկեղեցին հաճախել²⁹:

1712թ. ապրիլին հրապարակված մման մի հրամանագիրն է հիմք տվել Թավրիզի բեկլարբեկին տեղի հայերից 25 հոգուց, որոնք թույլ չէին տալիս մյուս հայերին հաճախել կաթոլիկ միսիոներների տներն ու եկեղեցին, որպես տուգանք 50-ական թուման գանձել³⁰: Եվ որպես շահական երկդիմի քաղաքականության վառ ապացույց, կարելի է բերել Մատենադարանի կաթողիկոսական դիվանի 1գ 247 վավերագիրը, որը իրենից ներկայացնում է պարսից մույն շահ Մուլթան Հուսեյնի 1712թ. մոյեմբերի հրովարտակը, որով շահը խիստ սահմանափակելով հայության շրջանում կաթոլիկական քարոզչության շրջանակները՝ պահանջում է նաև ետ վերադարձնել վերը նշված տուգանքները:

XVIII դարի սկզբին, երբ հայ ազատագրական շարժումը իր կողմնորոշման մեջ շրջադարձ է կատարում դեպի Ռուսաստան, հայոց եկեղեցին փոխում է իր դիրքորոշումը կաթոլիկական քարոզչության հանդեպ և ջանք թափում միսիոներների ակտիվ գործունեությունը հայ բնակչության շրջանում սանձահարելու ուղղությամբ: Հայ եկեղեցու կողմից եվրոպացի միսիոներների դեմ լուրջ պայքար է մղում Ալեքսանդր Ա Ջուղայեցի կաթողիկոսը: Վերջինս դեռ մինչև Էջմիածնի կաթողիկոս դառնալը հանդես էր եկել որպես «բռնուն պաշտպան հայադաւան ուղղափառութեան», որի մասին վկայում են նրա գրած «Գիրք ատենական, որ ասի վիճաբանական»-ը (Նոր Ջուղայում 1687թ. տպագրված) և «Աղօթամատոյց»-ը (1687թ. պատրաստած ու 1790թ. տպագրված)³¹: Նրա կողմից են ձեռք բերվում 1710թ. և 1712թ. շահ Մուլթան Հուսեյնի հրովարտակները, որ սահմանափակում են եվրոպացի միսիոներների գործունեությունը հայության շրջանում³²: Հետագայում Աստվածատուր Կաթողիկոսի խնդրանքով մույն շահը վերահաստատում է իր 1717թ. հրովարտակը³³:

Նշված ժամանակաշրջանի պարսկերեն հրովարտակներում, հատկապես նրանց խնդրագրերում, հաճախ բավական մանրամասն են արձանագրվում պատմական իրողությունները, որոնք օգնում են ճիշտ պատկերացնել պատմության զանազան հարցերի դրվածքն ու իրականությունը: Այս առումով հետաքրքրական մնուշներ են Մատենադարանի կաթողիկոսական դիվանի 2ր թղթապանակի 108 և 118 վավերագրերը, որոնցում համագամանալից կերպով նկարագրվում են Տաթևի կալվածքների նկատմամբ մահմեդական պաշտոնյաների ու հայ իշխանավորների կողմից հասցված անօրինականություններն ու չարաշահումները, մահ-

մեղական ցեղերի ոտնձգություններն ու հայ գյուղացիության կողմից խռովարարական արարքները:

Թե որքանով են այս հրովարտակները պաշտպանել Սեֆյան Իրանին հայատակ հայության և հայ հոգևորականության իրավունքներն ու հավատքի միասնությունը, դժվար է ասել: Հայտնի է սակայն, որ Իրանի Սեֆյան պետությունը XVIII դարի սկզբին լինելով բավական թույլ, ի վիճակի չէր վերահսկելու քաղաքական դրությունը իր երկրի ներսում և կանգնած էր փլուզման եզրին:

KOSTIKYAN KRISTINE

SAFAVID SULEYMAN, SULTAN HUSEYN SHAHS' EDICTS
OF YEREVAN MATENADARAN
(Summary)

There are more than 100 edicts issued by Safavid shahs Suleyman, Sultan Husyn and Tahmasb II kept in Yerevan Matenadaran. Some of these edicts are original documents, others - savads, copies confirmed by divan-al-sadarat, the highest body of Muslim clergy and shari'ya-notarial offices or copies having no seal or signature, nevertheless of considerable historical importance. These edicts have reflected the worsening social-economic and political situation formed in Iran during the decline period of Safavid Empire, a period when the religious intolerance towards Armenian population, illegal deeds and abuses of state officials and wrongdoers were intensified. The major part of those edicts were obtained by Etchmiadsin catholicoses and other high clergymen to protect the religious rights and customs of Armenian population subject to Safavid Iran, to put an end to the encroachments of local officials on the land property of Etchmiadzin, Tatev and other Armenian cloisters and to restrict the missionary propaganda among the Armenians.

ՇԱՆՈՅԱԳՐՈՒԹՅՈՒՆՆԵՐ

1. Ս. Երևանցի, Ջամրու, Վաղարշապատ, 1873, էջ 216-222:
2. Տե՛ս Մատենադարանի պարսկերեն վավերագրերը (կազմեց Հ.Գ. Փափագյանը). հրովարտակներ, պրակ I, Երևան 1956; պրակ II, Երևան 1959; կալվածագրեր, պրակ I, Երևան 1968:
3. Սավադի վերին մասում դրոշմված կնիքը իր մեջ պարունակում էր շահի անունը, իսկ նրա շուրջը գրված էր «քարճրագույն դիվանի պատճենի կնիքը», ինչպես օրինակ հետևյալ դեպքում (տե՛ս կաթողիկոսական դիվան, թղթ. 1թ, 136. مسودة ديوان اعلى بنده شاه ولايت صفى تاني: مير), իսկ փաստաթղթի ստորին մասում դրվում էին սադրի կամ մուֆթիի կնիքները:
4. Տե՛ս ՄՄ, կաթողիկոսական դիվան, թղթ. 1թ, վավ. 156 և 163:
5. Այսպես, ՄՄ, կաթողիկոսական դիվանի թղթ. 1թ, 140 վավերագիրը թղթ. 1թ, 137-ի պատճեն է; 1թ, 139ա-ն՝ թղթ. 4, 112-ինը; թղթ. 2թ, 186-ը՝ թղթ. 2թ, 182-ինը:

6. Համեմատի՛ր ՄՄ, կաթողիկոսական դիվանի թղթ. 1գ, վավ. 252-ը և թղթ. 1գ, վավ. 885-ը, թղթ. 1ր, վավ. 173 և թղթ. 1գ, վավ. 884:
7. دکتر مریم میراحمدی، دین و دولت در عصر صفوی، تهران ۱۳۲۹، ص ۷۴
8. ՄՄ, կաթողիկոսական դիվան, թղթ. 1ր 146:
9. دکتر مریم میراحمدی، دین و دولت در عصر صفوی، تهران ۱۳۲۹، ص ۶۰
10. Տե՛ս Կաթողիկոսական դիվան, թղթ. 1ր, վավ. 144, 145 և այլն:
11. Տե՛ս Կաթողիկոսական դիվան, թղթ. 1ր, վավ. 129, 134, 136 և այլն:
12. Հ. Փափազյան, Սեֆյան Իրանի ասիմիլյատորական քաղաքականության հարցի շուրջ, «Բանբեր Մատենադարանի», 3, Երևան, 1956, էջ 95:
13. Կաթողիկոսական դիվան, թղթ. 1ր, 129:
14. Ջաքարիա Ազուլեցու օրագրությունը, Երևան 1938, էջ 65:
15. Նույն տեղում, էջ 83; ՄՄ, Կաթողիկոսական դիվան, թղթ. 1ր, 134:
16. Մանր ժամանակագրություններ, հ. 1, Երևան 1951, էջ 311:
17. Նույն տեղում, հ. 1, էջ 395:
18. Հ. Փափազյան, Սեֆյան Իրանի ասիմիլյատորական քաղաքականության հարցի շուրջ, էջ 92:
19. ՄՄ, կաթողիկոսական դիվան, թղթ. 1ր, վավ. 173, 156; թղթ. 2ա, վավ. 66, 68, 70ա; թղթ. 2ր վավ. 118 և այլն:
20. ՄՄ, կաթողիկոսական դիվան, թղթ. 1ր, վավ. 181; թղթ. 2ր, վավ. 108, 118; թղթ. 2ր, վավ. 114 և այլն:
21. ՄՄ, կաթողիկոսական դիվան, թղթ. 1ր, վավ. 182:
22. ՄՄ, կաթողիկոսական դիվան, թղթ. 1ր, վավ. 182, 206, 220; 2ր 130, 131:
23. ՄՄ, Մելիք-Շահնազարյանների ֆոնդ, 241, գործ 1, վավ. 127:
24. В. А. Байбуртян, Армянская колония Новой Джульфы в XVII веке. Ереван, 1969, с. 126.
25. Աշ. Հովհաննիսյան, Դրվագներ հայ ազատագրական մտքի պատմության, գիրք 2-րդ, Երևան, 1959, էջ 175:
26. Հայ ժողովրդի պատմություն, հ. 4, Երևան, 1972, էջ 122:
27. Աշ. Հովհաննիսյան, նշվ. աշխ., էջ 176-177:
28. عبد الله بن خوافي، روابط سیاسی ایران و اروپا در عصر صفوی، تهران ۱۳۷۲، ص ۲۷۳.
29. Հ. Աճեմյան, Պատմական Թավրիզի ելն հայությունը, Դիվան Արապատականի հայոց պատմության, հատոր Ա, Պեյքրոթ, 1980, էջ 74:
30. Տե՛ս ՄՄ, Կաթողիկոսական դիվան, թղթ. 1գ, վավ. 247:
31. Մաղաքիա արքեպիսկոպոս Օրմանյան, Ազգապատում, հ. Բ, Էջմիածին 2001, էջ 3184-3185:
32. ՄՄ, Կաթողիկոսական դիվան, թղթ. 1գ, վավ. 268, թղթ. 1գ, վավ. 247:
33. ՄՄ, Կաթողիկոսական դիվան, թղթ. 1գ, վավ. 272: